

四庫全書

史部

欽定四庫全書

湖廣通志卷六十五

義士志

長沙府

東漢陳平子後漢書范式傳長沙陳平子同在太學
與式未相見而平子被病將亡謂其妻曰吾聞山陽
范巨卿烈士也可以託死吾沒後但以屍埋巨卿戶
前乃裂素為書以遺巨卿既終妻從其言時式出行

適還省書見瘞愴然感之向墳揖哭以為死友乃營護平子妻兒身自送喪於臨湘未至四五里而去

宋丁雋姓譜醴陵人習春秋時稱丁三傳兄弟十七人一家聚三百口無間言大中祥符中詔旌表其門閭

鄧咸楚紀湘陰人天禧間創義學於邑南訓誨弟子及湘楚之士如江夏馮京安州鄭獬胥從之遊姪珙為豐城主簿夜聞庫丁聚哭詰之曰失官錢三百貫

珙盡以錢代之還官其人感惠以二女獻之不納皆
咸教也

元陳天福姓譚茶陵人歲凶發廩平糶貧不能糶者
輒周之有道士丐米天福與之一斗道士酬以百錢
天福不受道士出題其壁有桂子蘭孫聯步武之句
後子桂孫蘭孫果登第慕義樂施有父風遭宗革不
仕營東山書院為終身計博學好古著述尤富輯文
選補遺四十卷

明黃謨善化舉人析產多讓遺其昆弟置家祠田百

餘畝通判雲南值沐府卒交譁謨往諭遂定

見府志

皇清曹景星益陽歲貢生孝友篤至垂老無間見義必

為不私財利刊家謀修學宮身獨任之數拯人于

危尤敦所親里中稱其篤行老成云祀鄉賢

陳六禮攸縣諸生順治三年有山賊之警六禮率

鄉勇禦之被執罵賊死其妻朱氏亦自經十四年

詔旌其門

廖方達寧鄉人巡撫韓世琦以方達名諸生檄署
茶陵學正與弟瀘溪訓導方遠友愛最篤置義田
姻宗族歲饑悉推廩粟賑貧瘠曰天災流行豈宜
獨飽

黃棣開湘鄉人講求大小宗法收撫族之孤貧不
能自存者有曾氏子負官租逮繫甚急其母將自
鬻以償棣開為代輸歲饑散穀千餘石流寇至集
鄉人守望邑令長亦賴之

金匱要略卷之八
卷六十五
何其仙寧鄉諸生順治己丑大疫其仙為施藥餌
延醫診視多所全活兄弟不析產不私財訓誨子
姪有古風焉

龍伯冠攸縣諸生事親篤孝癸己歲荒貯租七百
石悉以捐賑隣有張魁伯欲鬻妻償負伯冠捐金
以全之督學繆沅為表其廬云

劉溫良茶陵諸生性慷慨與人交輒傾肝膽友朋
困急傾囊濟之吳逆之變溫良叅贊征西將軍穆

占幕府軍機多所指畫薦授安仁今以迴避本省解歸

衡州府

晉李義姓譜鄴縣人太寧中盜起荆湖義傾家貲市兵器率鄉人擊破之闔境以安荆州收陶侃召至麾下分兵使擊賊戰屢有功事平旌賞獨優鄉民立祠於故居號其地太尉原

南北朝何弘齊書孝義傳衡陽何弘疎從四世同居

並共衣食詔旌表門閭蠲租稅

五代廖偃衡山人馬希萼為徐威所逼幽於衡山偃率臧獲及鄉人與彭師暠共立希萼為衡山王斷江

自守

見舊通志

按五代史楚世家馬希崇遣彭師暠

廖偃囚希萼於衡山師暠奉希萼為衡山王不言偃共立未知舊志何據特存而辯之

元段清遠鄰人元季兵亂民不自保清遠練習丁壯悉力防禦境賴以安有官勳後征溪峒歿特加卹廕

同時李均佐亦有守禦功

見舊通志

李均佐

見上

明周誠衡陽人御史均祿之子正統三年春載稻七千五百石賈於南都經九江安慶值大飢盡以所載賑之有司以聞賜勅獎諭復其家百年建坊旌之

歐陽梧安仁人光祿署丞天性孝友篤於宗盟凡服屬之親月有廩給無飢凍者萬厯十七年歲歉梧輸粟千石以賑有司奏聞詔旌其閭

聶廷鳳常寧人資性篤實尤沉潛問學嘗捐金脫人於難有宿負力不償者輒焚其券祀鄉賢

羅宓明鄆縣人邑罹流寇劫掠宓明結寨保障之全活甚衆

鄒承芬鄆縣諸生昆弟七人承芬嫡且長父遺命以貲產予承芬倍諸子承芬藏棄不以示諸弟父卒乃均產析之督課諸弟學成並著文譽

胡彥聰臨武人事孀母能得其歡心析腴產以予弟

用薦辟起家為重慶府同知恒捐俸佐公費歸置義田建家塾族人多利賴焉

謝如珂未陽人為諸生篤志文學獻賊陷湖南如珂集鄉勇拒戰死之

以上見舊通志

皇清陳汝方太常卿宗契之孫有黃某者負富人重貲將鬻其婦以償汝方發其家所藏穀帛并稱貸盡為償之夫婦遂得全士論高之

見舊通志

詹象鼎常寧諸生邑人卜遷學宮皆曰象鼎宅地

吉鼎曰果吉吾當毀宅不願獨利也由是新學遂

成

永州府

南北朝齊譚弘寶齊書孝義傳零陵譚弘寶疏從四
世同居並共衣食詔旌表門閭蠲租稅按齊書弘寶
與衡陽何弘皆建元時人附見封延伯傳

宋周世南姓譜祁陽人祥符進士少好學遊上庠聘
董氏女未娶而女失明董氏請離婚世南父以書寄

京師周世南報曰人生配偶有定分始全終廢天也
既第成婚士論高之累官至駕部郎中以少卿致仕
蔣漳明一統志零陵人少辭家入太學既不過棄而
歸隱黃庭堅在宜州病革漳往見焉庭堅委以身後
事及卒為棺斂具舟送歸鄒浩謫永州漳從之遊浩
有昭州之行漳又為經紀其家

唐幹東安人少負奇氣舉於鄉三試禮部不第歸隱
龍溪邑連歲被寇幹重門設險捐金散穀為族里倡

境內以安

見舊通志

元吳友遜明一統志字致恭道州人弱冠通武藝畧涉書史元末盜起友遜仗義保障民賴以安

明劉蘭孫江華人生而魁岸剛勇有謀賊首李夜叉作亂永州府判領兵征勦數月未獲聞蘭孫勇造廬請助入山一鼓遂擒賊首

張琮東安人守鎮百戶宣德二年苗寇犯境琮冒矢石拒敵中流矢卒

唐斌東安人持身廉約自其七世祖明甫至斌兄弟皆同爨無間言斌由歲貢授廣州府檢校以官俸置田與兄弟共之

盧竒祁陽人萬厯庚辰進士初聘同邑張氏女及笄而瞽女家請改婚竒竟娶焉人稱其義祀鄉賢

唐周慈零陵人為人孝友篤志正學江西萬元吉司理永州甚器之癸未流賊入湖南官民驚潰周慈從元吉俱死

以上見萬通志

寶慶府

明車大敬邵陽人明經未仕究心理學言行篤實尤以孝友著鬻產以資兄宦為善於鄉薰其德而善其長者為多卒年九十

見舊通志

楊海清明一統志城步人有勇力為眾推服景泰八年洞苗肆掠邵湘海清率其妻及其徒眾追戰於龍王橋以後援不至與其妻俱遇害有祠祀之

彭承孟武岡人土寇袁有志陷州承孟曰國家養士

三百年殉節報効正在吾儕率其子夢麟夢龍督鄉
勇勦賊值州師失期為賊所蹙投潭以死夢麟曰吾
父死吾寧獨生力戰死之夢龍擒獲賊首

見府志

岳州府

明沈植臨湘舉人歷官僉事歲饑與弟枻榜各輸穀
千石以賑詔建坊旌之祀鄉賢

沈廷燧臨湘人捐穀賑荒開誠化盜家藏書萬卷屬
續時志出以貯學宮

周一宮臨湘人年四十喪妻誓不再娶後舉於鄉任
資陽令之終身不置姬妾士論高之

楊紹儒臨湘人少習舉子業不樂仕進力田教子篤
於友誼析產時舉其私囊悉分與昆弟置田以贍族
人甃橋以濟行者子一鵬成進士封太常少卿祀鄉
賢

蕭時逢巴陵人會川巡檢居鄉施藥餌給轄積買山
作義塚萬厯戊子春洞庭風作覆溺者四十餘人時

逢悲斂而瘞之太守王濬表其宅

彭岡平江人萬厯己丑大饑岡上書於縣令勸富人
出粟為粥以賑而岡率先捐米百石鄉人以岡非素
封尤德之

吳采臨湘人以孝友著聞於族間所置田宅悉與其
庶弟均之子嘉賓官同知嘉兆官教授俱由明經策

仕 以上見舊通志

常德府

南北朝邵榮興齊書孝義傳武陵郡邵榮興文獻叔
八世同居詔旌表門閭蠲租稅

文獻叔

見上

范安祖齊書孝義傳武陵范女祖李聖伯范道根五
世同居詔旌表門閭蠲租稅

李聖伯

范道根

俱見上

明石瑗武陵人瑗十世祖廷河訓約子孫同爨至瑗
族益蕃衍恪守祖訓長幼無間太守陸邦造其廬奏

瑗家十世同居敦睦可風詔建坊表之并復其家

見

舊通志

唐景三楚文獻錄常德衛人性謹厚父有養子景讓
產與之以慰父志歲稔煮粥以啖飢者尤喜助人婚
喪以子鍊貴封御史有司請謁逃匿入村子姓強之
曰雖非贖官原非實任安能一旦羣縉紳出入耶七
舉鄉飲賓不赴年八十

談錄武陵人自祖隆以下至錄凡七世同居成化間

有司以聞奉詔旌其門

劉國會武陵人性耿介不阿領鄉薦筮仕商丘遭變
慷慨死義

柳之彥孝子紀之孫為獻賊所執欲降之之彥曰求
忠臣於孝子之門豈有祖父受旌而子孫猶屈膝從
賊者乎賊怒斷手割鼻罵不絕口

以上舊通志

辰州府

宋楊瀨黔陽人素驍勇鄉有寇警兄弟三人併力捍

禦民賴安全立祠以祀

見舊通志

元向良嗣淑浦人至正中草賊王七叛人多從之良嗣獨不附賊縱火燒良嗣忽大雨火滅賊感動釋去

見舊通志

明嚴秀淑浦人香爐寨苗叛秀應募赴都勻累獲戰功有官勳秀曰吾無以官為也但求此一方安耳棄

之來歸

見舊通志

皇清唐大純黔陽人明末流賊劫掠村墟大純止一子

名新居並其姪女為賊所繫索金以贖大純念難
兩全而弟大組早世獨遺一女遂棄己子贖姪女
後大純復生子有瑞有學行云

直隸澧州

晉周該晉書周該傳天門人性果烈以義勇稱叔父
級宜都內史亦忠節士聞譙王承立義湘州謂該曰
王敦稱兵構逆譙王尅期舉義此烈士致死之時汝
其成吾志申歎於王乎該欣然奉命潛至湘州與承

相見承大悅會款遣其將魏又圍承甚急該與從事
周崎間出反命為人所執考之至死竟不言其故

元羅長卿安鄉舉人為襄陽路總管倪文俊之亂有
保障功時兵荒相繼長卿家貲鉅萬賑貸全活者甚
衆

鄧均忠石門人峒民寇掠均忠擊平之紅巾至又拒
之境內以寧

張貴和慈利人與弟繼和集兵捍境鄉里從義者多

歸之倪文俊來寇貴和戰敗死之

以上俱見舊通志

皇清任春澧州人其父紀早卒事母盡孝歲大飢出穀
千餘石以賑明末劉六寇亂州派軍餉一千兩春
悉以家貲輸納

直隸郴州

明高任光宜章人成進士以好義聞於鄉里

見舊通

志

皇清李元郴州人紅賊盤踞萬陽山興寧鄱縣俱被劫掠

元捐貲集衆捍禦州境得全

見舊通志

張一元永興諸生康熙十七年應征南將軍穆占
募隨參謀軍務穆占委守永興吳逆悉賊兵環疆
疊攻不下遂解去逆誅穆占委奇

上諭招撫餘黨至耒陽賊衆抗拒脅降一元大罵賊磔
之

義民

附

長沙府

明譚永壽茶陵人質言篤行家無餘積喜於應人緩急嘗割私田以平族爭貸人金以還去婦年八十有

三

見舊通志

皇清楊惠生善化人樂善好施嘗以私廩穀千石減市價三之一糶與貧戶復糶米三百石糶價如前其他助婚葬治橋梁葺渡船捐貲一無吝惜鄉人德之

衡州府

明廖璜常寧人成化二十年歲大饑輸粟賑濟有司
申請院道奏旌表之賜冠帶

傅良瑞桂陽州人篤於友愛撫孤姪如子隆慶改元
歲大歉傾其廩困以振乏絕

譚安暉鄱縣人遇歲歉出粟賑濟嘗有偷兒入室安
暉覺而起飲之酒贈以金且勸其改行自新里人聞
其事安暉未嘗自言也晚舉二子人以為篤行之報
云

廖舒鳳藍山農人有厚貲人緩急借貸輒應之不取
子錢力不償者還其券同時陳鑑屢還人遺金不受

謝鄉里並稱為長者

以上見舊通志

皇清鄧孔符桂陽州人天性孝友兄孔範病革孔符剖股

療之

見舊通志

永州府

元劉獲孫江華人至元甲午歲飢行省遣官到縣勘
實令恐擾累以豐熟報官即去獲孫行追至永州哀

鬴不已官始復來勘果實發倉廩賑民賴以蘇又連
三年大飢獲孫嘗煮粥施濟里民德之

文如阜東安人性行敦樸以腴產讓兄居側有橋當
孔道倡善修葺大德壬寅歲飢發廩以賑鄉里

以上

舊通志

明曾恭祁陽人嘗與衆同浴於江得金滿囊意必同
浴者所遺伺之至夜分果有一少年泣而來訊之曰
吾商也浴於此忘取囊金吾無還鄉理矣將投於江

金史四八
卷六十五
恭急呼曰爾無憂吾待子久矣挈所拾還之

唐太正東安人輕財好義建石期橋費八千餘金七年而功始竣又助修濟川橋後人立祠橋旁

陳經東安人凡宗黨貧乏者必捐貲濟之邑中遷學建橋咸得其扶助

鄧秀東安人弟洪卒於戍兩孤皆髻鬢秀撫養成立各與娶婦授產治生

劉仁聰東安人歲大飢道殣相望仁聰捐米賑貸鄉

人賴全活者甚衆

以上見舊通志

寶慶府

明陳佩邵陽人潔己好修屢預鄉飲酒禮年九十二

例賜冠帶

見舊通志

皇清侯國弼邵陽人家素貧自力衣食然喜施予亂兵

執其兄國弼奔告曰我能為尊釋吾兄惟命是聽

兄得脫國弼乃大罵遂見害

見舊通志

岳州府

明周銘臨湘人性剛方輕財重義成化弘治間歲大飢銘前後出數千餘石賑濟邑多賴存活旌其門曰

義門

沈鎮臨湘人嘉靖乙卯歲大飢輸穀千五百石以賑撫臣顏其堂曰尚義

姚文宣臨湘人孝弟力田三世同居郡守李鏡榜其名於旌善亭提學蔡潮嘉其行誼為書百忍堂

江禹合巴陵人獻賊殺掠積屍以萬計捐貲收葬於

丁油橋官道之南司理戴吉人過而流涕題曰萬枯

壟

以上見舊通志

常德府

明燕政桃源人正統六年歲飢陳請於朝願輸粟千五百石賑濟詔賜為義門仍免三年戶役

陳仲鈞常德衛人孝友樂施捐私租倡立義倉數歲全活甚衆凡建五石梁又修神鼎門外江岸甃以石郡守顏其堂曰惠濟

劉從禮武陵人歲飢捐銀千兩粟千石賑濟詔建坊旌之

賀璣武陵人多隱德遇歲飢賑粟千石

陳湯命武陵人有隱德其稚孫嬉於巷拾遺金一封有姓字湯命訪年餘得其人還之

段光遠武陵人有勇畧與兄光啟同遇賊兄被執光遠持刃連殺數賊以救兄遭他賊格鬪兄見害僅以身免

胥本初 曾仲賢俱龍陽人正統六年以尚義賑飢
受勅獎

鍾志遠桃源人歲祲煮粥以食飢者穀價翔涌志遠
復發廩平糶每石受銀三錢仍輸於官以助賑恤

蕭襄 龍鑾 裴紹度 李聞譽俱以好義聞

以上

見舊通志

永順府

皇清劉漢景保靖人幼孤兩兄繼歿撫教其兄子五人

如已出

王佐保靖人敦睦宗族好施予鄉里夙負未收貧
無以償者志還其券

直隸郴州

明楊紹郴州人嘉靖間歲飢捐穀以賑嘗逆獲遺金
因留路傍以待少頃失金者至紹驗實還之

鄧紳永興人歲大飢出粟千石以賑恩賜義士坊旌
之

劉宗林宜章人正統時歲飢出穀千餘石賑荒有司
給扁獎之

李思素永興人正統時歲飢賑穀千石詔旌其門
以

上見舊通志

直隸靖州

明毛大富會同人萬厯間市民劉廷紀家被火擊一
箱俾其族人劉德實授大富倉猝不辨也後數日詣
德索以歸德無以應廷紀忿其乾沒詐之縣令將加

刑大富負箱疾趨訟庭曰廷紀授我非劉德也令以示廷紀皆舊封識啟視不失銖兩令嘆曰此誠義民矣

栗朝應會同人樂善好施傾囊濟貧萬厯間縣令申

請表揚

以上見舊通志

附增

皇清譙衿沅江廩生明正德時始祖大相有隱德子三炳最長炳兄弟子姪二十人譙氏七世同居始此

炳再傳至學賢立規條以教其家明季避寇失弟
學優所在諸兄弟號泣幾絕分道踪跡得之又一
傳至仕忠環宅樹多合抱有子母鹿馴其下又一
傳至衿親支一百一十九人譙氏家法事無大小
以年長有才能者主之衿弟衿以祖命主家事續
作家訓二十條子若孫凜遵之隣家火及衿兄弟
入祠堂抱神主避火火隨熄二百餘年喪祭無失
禮每食男女異席終事無譁嬰孺咸聚一室自少

即使知親愛家所畜牛每出入先後以齒在牧地
如之鄉人不問而知為譙氏牛也其他多類此自
炳至衿之孫行凡七世曾孫行五人尚幼不以世
紀今同居如故雍正十年蒙

恩建坊

旌表

欽賜

御書世篤仁風綾匾

湖廣通志卷六十五

欽定四庫全書

史部
湖廣通志卷六十六

詳校官監察御史臣陳化龍

檢討臣德生覆勘

總校官知縣臣繆琪

校對官助教臣羅善選

謄錄監生臣李觀光

欽定四庫全書

湖廣通志卷六十六

列女志

睢麟者官禮之所託始也江漢之間於地為楚二
南諸詩大半皆賢婦貞女之作豈文王之化獨及
女子哉蓋教始閨門風行草偃其被化獨難耳忠
臣孝子代不乏人固其秉性則然抑甄陶於教育
之中而涵濡乎詩書之澤者深也彼深閨弱質或

茹苦終身孝慈兼備或捐軀明志刀鋸是甘不又
難哉稽往蹟之芳輝紀

聖朝之旌淑勿遺勿濫竹帛永垂又況

錫之祀典馨香俎豆二南之化不得專美於前矣

總部

春秋鄧曼楚武王熊通夫人左傳桓公十三年楚子
使屈瑕伐羅鬬伯比請濟師王告鄧曼曼曰大夫具
非衆之謂其謂君撫小民以信訓諸司以德而威莫

教以刑也莫教狃於蒲騷之役其不設備乎莫教果
敗莊公四年楚子伐隨告夫人曰余心蕩鄧曼歎曰
王祿盡矣盈而蕩天之道也先君其知之矣故臨武
事而蕩王心焉後卒於軍

樊姬列女傳楚莊王之夫人也王好狩獵姬諫不止
乃不食禽獸之肉王改過勤於政事王嘗聽朝罷晏
姬曰何晏也王曰與賢者處丘子語爾姬笑曰虞丘
子相楚十餘年所薦非子弟則族昆弟未聞進賢退

不肖是蔽君而塞賢路知賢不進是不忠不知其
賢是不智也妾之所笑不亦可乎明日王以姬言
告虞丘子遂迎孫叔敖而進之王以為令尹治楚
三年而莊王以霸

伯嬴列女傳秦穆公女楚平王夫人昭王母也吳入
郢昭王亡吳王闔閭盡妻其後宮次至伯嬴伯嬴持
刃曰妾聞夫婦之道人倫之始王教之端是以明王
之制使男女不親授受所以遠之也今君王棄儀表

之行縱亂亡之欲何以行令訓民且妾聞生而辱不
若死而榮使君王棄其儀表則無以臨國妾有淫端
則無以生世一舉而兩辱妾以死守不敢承命吳王
慙而退

貞姜列女傳齊侯女楚昭王夫人也王出遊留夫人
漸臺之上王聞江水大至使迎夫人忘持其符夫人
曰王與宮人約令召宮人必以符今使者不持符妾
不敢從使者行使者曰若還取符恐後矣夫人曰貞

女之義不犯約勇者不畏死守一節而已越義而求生不若留而死於是使者取符則水大至臺崩夫人流而死

越姬列女傳越王勾踐女楚昭王姬也王讌遊蔡姬在左越姬叅右王曰吾願與子生若此死又若此蔡姬曰固願生俱樂死同時王顧謂史書之復問越姬對曰樂則樂矣然而未可久也昔者先君莊王淫樂三年不聽政事終而能改卒霸天下妾以君王為能

法吾先君將改斯樂勤於政也今則不然而要婢子
以死妾不敢聞命於是王悟敬越姬之言居二十五
年王救陳二姬從王病有赤雲夾日如飛鳥史曰可
移於將相王曰將相之於孤猶股肱也越姬曰大哉
君之德妾願從王矣遂自殺王薨於軍中蔡姬竟不
能死

孫叔敖母列女傳叔敖兒時出遊見兩頭蛇殺而埋
之歸而泣母問其故對曰吾聞見兩頭蛇者死今出

遊見之母曰蛇今安在曰吾恐他人復見殺而埋之矣母曰汝不死矣夫有陰德者陽報之德勝不祥仁除百禍爾默矣必興於楚及長果為令尹

子發母列女傳子發攻秦絕糧使人請於王因歸問其母母曰士卒得無恙乎對曰分菽粒而殮之又問將軍得無恙乎對曰朝夕芻黍黍梁子發破秦而歸母閉門不納使人數之曰子不聞越王伐吳客有獻酒一器使人注江之上流使士卒飲其下流獻糗一

囊王又賜軍士分而食之而戰自十倍今使人入於
死地而自康樂於上雖有以得勝非其術也子發謝
罪然後納之

貞姬列女傳楚白公勝之妻白公死妻紡績不嫁吳
王使大夫聘焉以輜駟三十乘迎之將以為夫人姬
曰白公生時妾幸得充後宮白公不幸而死願守其
墳墓以終天年今王金璧之聘夫人之位非所願聞
也妾聞忠臣不借以力貞女不假以色妾既不能從

死今又去而嫁不亦甚乎遂辭不行吳王賢其守節有義號曰貞姬

鄭瞽列女傳鄭女之媵楚成王夫人也初成王登臺宮人皆傾觀子瞽直行不顧徐步不變王曰顧吾以汝為夫人又與汝千金而封若父兄子瞽遂不顧於是王下臺而問曰夫人重位也封爵厚祿也一顧可得而不顧何也對曰妾聞婦人以端正和顏為容今者大王在臺上而妾顧則是失儀節也告以夫人之

尊封爵之重而後顧則是貪貴樂利以忘義理也王曰善遂立以為夫人

楚王莊姪列女傳頃襄王夫人縣邑女也初王好臺榭行年四十不立太子諫者蔽塞屈原放逐秦欲襲其國使張儀間之謂王曰南遊於唐五百里有樂馬王將往是時姪年十二謂其母曰願往諫之其母曰汝嬰兒也安知諫不遣乃逃以緹竿為幟伏南郊道旁王車至姪舉其幟王見乃止使人往問之還報曰

有一女童伏幟下願有謁於王召之姪至王曰女何為者也姪對曰妾縣邑之女也聞大王出遊五百里因以幟見王曰子何以戒寡人對曰大魚失水有龍無尾牆欲內崩而王不視王曰不知也因言王有五患故及三難王曰善後車載之立為夫人為王陳節儉愛民之事楚國復強

老萊子妻列女傳老萊耕於蒙山之陽人或言之楚王曰老萊賢士也王欲聘以璧帛恐不來駕至老

萊之門曰寡人愚陋願先生幸臨之老萊子曰諾王去其妻載菴策而來老萊具言之妻曰妾聞可食以酒肉者可隨以鞭捶可授以官祿者可隨以斧鉞妾不能為人所制投菴策而去老萊子曰子還吾為更慮遂行不顧至江南而止

接輿妻列女傳接輿躬耕以為食楚王使人持金百鎰車二兩迎之接輿不應使者去妻從市來接輿語之故妻曰先生躬耕以為食親織以為衣據義而動

其樂亦自足矣若受人重祿何以待之接輿曰吾不許也妻曰君使不從非忠也從之又違非義也不如去之夫負釜甌妻戴絰器變名易姓而遠徙莫知所之

於陵子終妻列女傳楚王聞於陵子終賢欲以為相使使者持金百鎰往聘之於陵子終曰僕有箕帚之妾請入與計之即入謂其妻曰楚王欲以我為相則結駟連騎食方丈於前可乎妻曰夫子織屨以為食

非與物無治也左琴右書樂亦在其中矣夫結駟連
騎所安不過容膝食方丈於前所甘不過一肉今以
容膝之安一肉之味懷楚國之憂其可樂乎於是出
謝使者遂相與逃而為人灌園

武昌府

宋張氏宋史列女列傳鄂州江夏民婦里惡少謝師
乞過其家持刀逼欲污之氏大罵曰庸奴可殺不可
辱師乞以刀斷其喉氏擒師乞待隣人至乃死嘉祐

中封旌德縣君表其墓曰烈女賜酒帛令郡縣歲時
致奠

陳求道妻蔡氏咸寧人為賊劉忠所劫不從併三子
殺之於茗山一孫逃

郡志

元魏雲瑞妻宋氏蒲圻人元季兵亂歲荒雲瑞卒於
齊安氏扶櫬涉江歸厝躬督仲子觀勵志讀書為名
儒宋濂誌其墓

舊通志

周憲章妻石氏江夏人至正中從父任公安夫卒織

絳撫孫四十年飢寒不易以壽終

王蘭孫妻劉氏蒲圻人年二十六子德俊纔六歲德
厚生僅六日而蘭孫亡誓死鞠二子至正壬辰寇起
斬黃蹂踐鄉邑二子奉母周旋獨完其宗

黃開妻宋氏蒲圻人夫死無嗣以姊子沆為後誓死
不渝 以上舊通志

何槐孫妻費氏蒲圻人夫病幾殆剖股和藥子燾有

傳 郡志

明孟福妻張氏明一統志江夏人年少守節洪武中旌弘治中市火延燒旌坊獨存

梅福妻馮氏明一統志江夏人年二十八福沒於兵馮力貧孝養舅姑守節洪武中旌

曾養吾妻陳氏明一統志江夏人夫歿於兵陳守節孝事舅姑洪武中旌

陳得顯妻張氏明一統志江夏人年二十七夫卒一子幼勤儉治家養姑宣德中旌

郭英妻朱氏明一統志武昌護衛人年二十五夫亡
守節成化中旌

生員丘達妻楊氏明一統志江夏人夫死氏年十九
守節歷三十五年成化中旌

陳玉妻康氏明一統志武昌護衛人夫亡年甚少撫
幼子力貧守節壽八十五成化中旌

劉思忠妻吳氏明一統志江夏人年二十三守節成
化中旌

千戶陳志妻彭氏明一統志武昌衛人年十八歸甫
數月志奉調征洪江寇陣亡氏遺腹生子政勵志守
節撫政成立世其官成化中旌

千戶胡鎮妻陳氏江夏人年十九夫亡無子守志以
老弘治中旌

舊通志

生員陳鎰妻郭氏明一統志江夏人年二十六夫亡
守節正德中旌

吳傑妻甯氏明一統志江夏人年二十夫死氏號泣

幾絕母戚欲奪其志氏刺面自垢持節五十七年正
德中旌

張隆妻劉氏江夏人正德中流賊入境氏匿草澤間
賊拽出欲刳以行氏以衣結其體蠅坐於地賊不能
污遂殺之蠅坐如生

舊通志

危景福妻馮氏明一統志江夏人年二十五夫卒撫
孤鳳翔成立未幾子婦俱歿孫昂甫二歲馮又撫之
孀居六十餘年壽九十一昂以明經任河南守萬厯

三年旌

詹文憲妻杜氏江夏人夫死守節三十五年事姑以

孝聞

郡志

歐陽貞女江夏人名金貞幼許聘羅欽仰父梧携
貞官柘城欽仰并從馬梧丁艱歸舟次儀真欽仰墮
水死貞年十四未字慟號欲自縊父母持之及殮剪
髮繫右臂以殉抵家葬畢貞請歸羅事姑至孝竟不
還父貽詩云生來願有家老去身無主可憐重可憐

揮筆淚如雨貞得詩大哭然卒弗奪也及姑卒或諷之貞曰誰能開棺取髮還我則易志矣獨棲一樓年

六十卒奏聞旌表

舊通志

生員伍境妻曾氏江夏人夫卒三子尚幼紡績撫孤守節五十餘年萬厯中旌

李踞妻向氏江夏人夫歿氏年二十九強族吞噬乃抱週歲兒築舍墓旁嘗有白燕巢門紫芝呈瑞具題旌表

白受采妻朱氏 白文燦妻朱氏 白陞妻周氏

白若采妻韓氏江夏人朱皆宗女姑媳俱少寡撫孤
陞亦早世遺二子周撫育成立又受采弟若采妻韓
氏亦少年守志人稱一門四節

黃孝女江夏人年十九父為牙僧斃於官僕女痛父
無後哭三日死里人即其居祀焉顏曰孝女祠

熊孝女江夏人大司馬廷弼仲女贅瀏陽胡大司寇
子數年父凶問至女傷父孤忠被寃椎膺長慟而絕

朱英燐妻吳氏江夏人年二十四而寡撫幼子成立
襲爵乃曰吾可以歸地下報吾夫矣遂絕粒三日死
奉旨旌表

黃養德妻張氏江夏人年少撫孤守志以歿

劉孝女江夏人幼孤與弟妹並育於伯父紹堯女年
十五病疫紹堯視醫藥獲痊繼而紹堯病女辛苦營
救竟不起哭二晝夜而殞

池可深妻張氏夫喪氏年二十五撫兩歲兒躍鯢事

舅姑辛勤備至躍鯤補弟子員邑父老欲舉其節氏令躍鯤謝之曰惟欲天知泉下人知耳衆卒舉之卒年九十有二有茹節錄賀文忠李夢白為之序

大學士賀逢聖妻危氏 媳曾氏 陳氏 孫媳某

氏江夏人獻賊破會城逢聖殉節溺滋陽湖氏率長媳曾次媳陳孫媳某及婦女輩投後園池水死闔門就義者二十餘人惟長孫士聰遊西江幼孫甫六齡為老婢引逃得免

朱華園妻周氏 女子媳周氏江夏人獻賊陷城
俱躍身火中自焚

指揮楊世泰妻朱氏江夏人宗室女適楊封恭人懷
宗癸未楊運糧北去獻賊陷城氏率子韜逃竄步不
能前泣謂韜曰汝父生汝一人勿以予故致絕楊氏
後汝其急逃言訖赴水死越三日韜潛求其屍葬之
韜之子奇登進士

陳龔德妻程氏江夏人夫早卒撫孤啟謨啟猷成立

獻賊破城不辱罵賊投水而死

陳騰龍妻李氏江夏人癸未流賊陷楚氏倉皇折足
度不能免積薪自焚三子象奇年十六躍身烈焰中
與母俱燼陳姓百餘人賊盡驅之江溺焉惟幼子志
奇初育於娣白氏匿寧湖獲免及左兵東下志奇被
擄白號泣呼天曰此兒去宗絕矣乃與夫雲龍隨至
九江為酒肆伺之一日志奇戲岸上負馳歸宗姓復

蕃 以上舊通志

危寧楚妻劉氏江夏人年二十六值獻賊屠城與夫
散失抱子隨母姑走恩武村賊追至執氏強之上馬
氏曰軍中不能携幼子待吾以子付母姑乃從容哺
其子拜辭母與姑故作欲上馬狀適路旁有塘急墜
水死

郡志

周琳妻何氏武昌縣人永樂初琳代父從戎戰死於
鷓兒嶺氏具衣冠招魂以葬誓死撫二子溥滋成立

詳孝子志

郡志

主簿蔡洙妻馮氏明一統志武昌縣人夫以明經任
廬陵簿卒於官氏年二十九抱孤扶櫬斷髮自誓苦
節四十餘年正統中旌

熊鏌妻胡氏 熊棣妻嚴氏胡蘄州人綿州教授顯
之女侍父綿州配安縣尹熊子鏌生子甫月鏌卒氏
號慟幾死後窆還武昌父母已家於綿難其少而寡
也欲留之舅姑亦憐而聽之氏曰兒熊氏婦留妾為
遂扶櫬歸蓄刀床頭自誓屬有危疾鏌弟善醫將診

視氏曰嫂叔不通問禮也吾未亡人耳安用藥年八

十有二卒孫婦嚴氏二十守志人稱雙節

郡志

生員周子儉妻易氏明一統志武昌縣人年十九夫
亡守節正德中旌

陳旺妻唐氏 女環兒旺汝陽優也正德間携氏及

女姪成兒遊食至九峯遇賊史聰者與旺同業艷婦
女色給旺出夜及青山殺之還携其婦女并姪入武
昌山中操刃脇唐氏不從殺之投尸荆棘明日徙藁

衣廟復賜環兒環罵曰賊殺吾父母恨不嚙肉肯汝
從乎又殺之血清廟中土寸許瘞屍糞壤中成兒伺
聰醉走告官乃斃聰於獄邑人張鍾靈買地改葬之

舊通志

郭文妻龔氏武昌縣人年二十一夫死守節歲荒貧
甚不少變邑令為賑給之

張鑾妻胡氏武昌縣人年二十四夫卒遺腹三月生
子楷家貧苦節翁姑欲嫁之陰納鄭氏子聘氏聞號

泣將自盡翁姑乃以已女代馮氏矢節終身

生員邵柯妻唐氏武昌縣人年少夫亡翁姑相繼歿乃歸依其兄弟苦節以死

黃琦妻黎氏武昌縣人年二十夫歿誓不改適奉姑卓氏教子朝儒苦節六十六年

盛仕潛妻舒氏武昌縣人年二十一夫卒矢志甘貧奉母余氏及卒哀毀盡禮

曹通妻李氏武昌縣人年十七通卒遺有二孤撫養

守節

以上舊通志

蕭相妻陳氏武昌縣人姑性奇嚴鞭撻苦楚氏奉順備至無何夫與姑相繼卒氏茹苦守節以終

郡志

吳維寰妻胡氏大冶人妾丘氏黃岡人胡武昌貢生如揆生母丘其庶母也維寰歿如揆甫五齡二氏年俱少誓志撫孤備嘗甘苦萬厯間中丞徐旌其門曰雙節如揆至老言及兩母猶依依孺子泣譚元春

為立傳

舊通志

孟紹勳繼妻劉氏武昌縣人勳卒於官氏年二十六

截髮毀容撫孤苦節歷四十餘年

郡志

生員宋景郊妻江氏武昌縣人夫卒子之愷甫一歲氏奉姑教子辟纊自給年三十餘即形衰骨立齒落

髮白直指給衣帛旌之

舊通志

生員陳敬王妻朱氏武昌縣人十九歸陳夫死撫遺孤為授室子又死依兩弟以活年七十七卒

吳如恒妻重氏江夏人適武昌吳如恒年十八夫歿

斷髮吞穢以自誓撫孤士貴既娶復夫媳改醮撫孫
大昌成立年八十卒

生員田九嶷妻胡氏武昌縣人適田六載夫卒子一
麟方襁褓單弱無依夫兄茂木擁厚貲不為賑恤且
逼令他適氏甘心苦守教子入庠矢節五十餘年

張肖月妻楊氏武昌縣人夫歿忍死撫子琦入庠連
舉四孫皆成立

生員曹某妻吳氏武昌縣人夫卒臥床不食父寬之

氏瞠視曰父何言遂側身面壁餓五日死將合殯氏棺先舉重不可前先其夫乃行

武進士吳時喬妻潘氏武昌縣人夫從征楊應龍歿於軍氏年二十扶櫬歸里守志六十六年

閩時舉妻胡氏武昌縣人夫歿一子甫二歲氏哀慟幾死誓志守節卒年六十九

謝某妻王氏武昌縣人夫歿氏年十九遺孤一歲復殤或將奪其志引刀夫死赤貧無依歸依兩兄足不

踰戶年七十七卒

以上舊通志

生員孟世第妻周氏武昌縣人年十八夫歿遺子謙
吉苦節訓養迄於成立

孟道凝妻金氏武昌縣人年十七夫溺水死遺腹舉
子名輝祖守節四十年 以上郡志

周實指妻黃氏武昌縣人夫早世氏撫遺腹子至八
歲亦殤守志不變 舊通志

熊晉妻楊氏武昌縣人夫歿無子女可依誓死不嫁

苦節三十餘年

郡志

熊正茂妻胡氏武昌縣人夫卒一子甫二歲氏甘貧

茹淡撫子有成守節五十餘年

舊通志

徐弘軒妻柳氏武昌縣人年十九夫亡守其子且得
孫後俱夭絕苦節七十餘年

生員吳自強妻高氏武昌縣人適吳克盡婦職得翁
姑心舉三子夫病氏割股進之卒不起值竒荒絕炊
有鄰人持百金向其父聘為繼室氏聞自沉於河遇

救免守志以歿

生員劉士奇妻胡氏武昌縣人夫卒遺腹生一子翁姑俱八十餘未幾相繼歿氏奠祭盡禮教子入庠節孝兼至

周慶年妻嚴氏武昌縣人生子弱齡夫歿氏誓志守死撫孤成諸生年八十餘卒

以上舊通志

湯某妻盧氏武昌縣人湯以遠行遇盜氏匍匐尋夫備歷艱苦歸而撫子髮黃齒落井里稱為湯節婦

郡

志

潘南嶽妻李氏黃州衛弁李榮楚女適武昌潘南嶽
年二十五歲夫歿四子俱幼氏經營夫喪淚盡繼之
以血苦節七十年四子皆列爵序

龔耀卿妻高氏武昌縣人年十九適龔踰歲生一子
夫卒氏薪水親勞針績營食奉公姑鞠孤子始終一
節人無間言

易方起妻胡氏武昌縣人生子學孔夫即見背氏矢

志撫孤食淡茹苦百折不回年八十餘卒

以上舊通

志

生員彭嶠妻胡氏武昌縣人夫歿無子女並無立錐之業絕葷茹素縫紉自活不改苦節

吳大來妻傅氏武昌縣人夫歿氏年二十一一女二歲誓無二心女長適柯敬老敬老早卒年二十無出亦誓志不二母子貧苦相依稱雙節云

生員柯啟正妻吳氏武昌縣人年十六生子鉞甫兩

月而夫歿誓死撫孤閨門嚴肅雖娣姒姑姊相聚笑
語不形三十年如一日

以上郡志

生員王思美妻嚴氏武昌縣人夫卒遺孤僅兩月父
母公姑咸令改適氏立志不回紡績撫孤閱五十餘
年如一日

生員萬友吉妻嚴氏武昌縣人夫以科試卒於旅次
氏年方笄生子甫四月誓志守孤歲時歸寧必告夫

墓始往

以上舊通志

太僕卿孟魯難妾黃氏維揚人獻賊犯武昌縣氏從
其子避難潯陽遇流賊索金帛甚急氏奪賊刀刺喉
而死

郡志

生員曹大春妻汪氏武昌縣人獻賊之變氏指懷中
兒謂夫曰妾與此子俱死矣賊入樊湖氏急赴水死
越七日尸浮淺渚猶兩手握嬰兒不可解遂並納諸
棺葬焉聞者哀之

樊口女武昌人不知姓氏年及笄未嫁左兵東下掠

置馬上以手侵其乳女怒噬賊首不得脫賊衆批其頰斷其手而齒已入骨剝肉出齒賊亦死

以上舊通

志

邵雲裳妻邵氏武昌縣人年二十二夫歿遺三子俱幼甘貧苦節流賊至挈三子走避被執罵賊而死後四月得屍貌如生

生員王家臣繼母王氏武昌縣人撫愛諸孤倍於前母夫歿茹苦守節為流賊所執罵賊死

以上邵志

光祿寺署正孟道翼妻胡氏武昌縣人性至孝父病躬侍湯藥疾革脫簪珥購棺葬未畢流賊突至執之

罵賊死

舊通志

李蓋臣妻熊氏武昌縣人獻賊破城獲氏欲污之奪刀自刎鄰媪見氏氣未絕救蘇扶竄山谷有胡姓者欲為子求娶氏曰吾頸可斷前事汝不聞乎其夫因覓氏為賊所殺氏聞痛哭三晝夜自縊死

魏夔一妻謝氏武昌縣人年二十二夫歿僅一女名

傑兒家無儻石遭亂匿身石穴中虎伴其側兵後饑
荒或勸其自為計氏曰吾何計惟有死耳自是人
不敢言竟飢寒而死

周翊明妻方氏武昌縣人夫卒一子甫六月值兵亂
備嘗險阻死守不變

袁友正妻盧氏咸寧人夫卒哀毀骨立晝日往守塚
塚無芴苴一日忽謂家人曰袁子至矣速為我治衣
棺言竟而逝邑志又載蕭氏

金史卷之八十三
卷六十六
陳思忠妻王氏咸寧人解元王倫女年二十六夫歿
僅遺二女苦節四十年正德中旌

張綱妻劉氏咸寧人嫁七月而夫死於京家貧無子
苦節不渝卒年七十五正德中旌

生員趙麟妻余氏咸寧人夫卒氏年二十五無嗣孀
居四十餘年隆慶間表其門

生員鄭鑾妻余氏咸寧人夫卒氏年二十餘守節四
十年隆慶中旌

王子英妻傅氏咸寧人年二十餘夫卒無嗣守節四十餘年隆慶中旌

孟機妻余氏咸寧人早寡密處一室人罕見其面子
養浩廷杖歸拜且泣曰兒幾無以見母氏曰兒今始
可以見吾矣奉旨旌表贈恭人

以上舊通志

顧九階妻周氏咸寧人少年矢志上官屢加旌獎
年八十

訓導余象賢母李氏咸寧人夫死氏年二十一象賢

甫週歲茹苦奉姑躬經教子冰操四十餘年

以上郡

志

生員鄭邦遇妻周氏 知縣鄭邦相妻楊氏咸寧人

明末流寇充斥望屋而噬周迫投塘死其婦楊氏翰

林之諶母也義不受辱同日蹈刃一門雙烈

舊通志

廩生唐之蕲妻胡氏咸寧人夫亡求殉不得每哭輒
嘔血數升設夫靈室中朝夕依之衰經二十餘年宛

若初喪

郡志

郭翊中妻黃氏咸寧人夫亡子民瞻始孩稚氏誓事翁姑避亂黃泥洞流賊執之詈罵不辱觸石而死血

清石成碧

舊通志

生員鎮朝經妻樊氏咸寧人早寡事姑盡孝廬夫墓側三十餘年

生員張煜妻余氏咸寧人適煜數載未有嗣煜逝自

縊死

以上郡志

李仲富妻任氏明一統志嘉魚人年二十生一子夫

七守節洪武中旌

李孝女嘉魚人名閨芳父為臣舉於鄉女稍習書史
母周氏疾篤封肉為湯以進疾遂愈

舊通志

李儒妻段氏嘉魚人夫卒氏年甚少一子襁褓或勸
之改適氏曰李氏惟此一息可攜入他人門哉卒不
可奪

羅列女嘉魚人值流賊亂匿蘆葦中為賊所執罵
不絕口賊支解之

崔琰妻楊氏嘉魚人年十八喪夫赤貧撫子至死不
渝

方貞女嘉魚人孟鋌女笄而未嫁夫死誓不更字依
父母終其身

李為邦妻周氏嘉魚人隨夫侍翁任保寧教授舟覆
夫溺死氏投水覓骸以救得全守節撫二子一補於
庠一舉明經

方守妻杜氏嘉魚人夫病割股以救果愈及夫歿勵

節撫孤

以上舊通志

李寶韜妻石氏嘉魚人年二十七韜卒撫兩月孤冰

霜自矢卒年七十有七孫宙著有節孝錄

郡志

孔玉瑩妻程氏 生員孔連塘妻蔡氏嘉魚人瑩早

死程撫連塘娶婦蔡氏連塘復夭遺孤紹芳甫四月

姑媳相依撫紹芳十五入泮嘗雪中凍餒鋤薪得金

數兩始度歲歉閭者謂天相苦節也

舊通志

生員李占燻妻饒氏嘉魚人比部郎饒完白女適李

未期而夫死誓死守節盡碎奩具著布素親勞苦若
窶人子閭里賢之

少保方逢時繼妻余氏嘉魚人隨夫京邸莊皇后聞
其賢召進內殿賜採桑服金剪桑筐各一氏拜命益
恭因謂逢時曰上眷過極矣古大臣知止足而戒盈
滿盍乘時引去保有完名乎逢時改容謝遂乞骸骨
進士熊開元妻徐氏嘉魚人熊避亂入粵舟次程鄉
縣蒿口氏知不免謂曰當使公見妾死次晨賊掩至

夾岸而陳氏急出自沈於水得其屍視衣履疊疊縫
無少罅

貢生童心開妻童氏嘉魚人世居白湖癸未獻賊亂
童隨夫抱子涉險入白雲山石洞賊大索山中心開
幸脫氏被執罵不絕口而死

生員李之馨妻余氏嘉魚人遇獻賊罵而死

童烈女嘉魚人未適同凡庠生伯隆避賊湖中流賊
至女佯以鍼線筐擲於河曰此中有寶賊渡筐兄得

脫女乃投水死

黃若水妻彭氏嘉魚人值流賊亂夫婦俱被掠氏誑謂賊曰釋吾夫吾伴汝去賊果釋其夫氏望夫行遠度勢不及追高聲曰汝放心去吾死不從賊賊怒立支解

王允茂妻左氏江夏尉延慶女孫允茂蒲圻人官閩之泰寧卒子愷方九歲氏扶柩還葬躬緝教子歷官
官僚

連輔妻任氏蒲圻人適輔僅七月而夫死矢志守節
撫遺子芳以明經任射洪訓成化中旌

任勝聰妻曹氏蒲圻人名淑清夫卒氏年二十子僅
七月苦節六十年弘治中旌

廖賓南妻魏氏蒲圻人二十而寡立祠奉祀年八十
八卒 以上舊通志

謝存憲妻趙氏 謝三誥妻龔氏明一統志蒲圻人
趙年二十五夫卒撫孤三誥又卒偕嫠婦龔氏甘貧

誓死守節嘉靖中旌

王世廉妻徐氏蒲圻人姑病侍湯藥不櫛沐者累月
年二十五夫卒撫遺腹子良謨勤苦萬狀後以子貴

膺恩贈

余某妻戴氏蒲圻人姑疾革氏割左臂肉啖之立愈
子恭鄉舉入太學以材幹督大工邑令為立忠孝坊
劉熾妻楊氏蒲圻人劉生而天閹氏伴之數十年相
敬如賓夫卒哀毀飲食必躬奠二婢感其義俱年四

十餘不嫁萬厯初旌

進士謝師彥妻金氏蒲圻人夫卒於京氏年二十子士成才數月苦志數十年足不踰閭

黃祐妻謝氏 子婦何氏 孫婦魏氏蒲圻人謝年

十六適祐恪事二姑祐卒撫孤成立復夫遺孫既長又天子婦孫婦俱年少孀居三世完節 以上舊通志

魏正模妻鄧氏蒲圻人夫歿有子方十齡或有奪其志者氏曰吾不死以姑哀子幼耳奈何逼我死耶市

居數十載人無間言侍御謝師啟有傳郡丞任文定
為誌銘云

魏方昇妻張氏蒲圻人年十八夫亡姑龔慰諭之得
不死勤孝貞操閭里賢之 以上郡志

龔窠妻余氏 龔維翰妻屈氏 龔理妻謝氏蒲圻
人窠歿僅遺一女余矢志不二立姪為後其孫維翰
娶屈氏曾孫理娶謝氏俱年少喪夫咸以死守人以
世節稱之云

縣丞但維城妻黃氏蒲圻人夫卒絕粒以姑命撫孤
苦節四十年萬厯中旌

郭立本妻田氏蒲圻人年二十夫卒遺腹生子鐸與

姑向氏相守四十年魏司徒題其門曰雙節

以上舊

通志

鄧日華妻魏氏蒲圻人華早卒氏深居扃戶苦節三

十餘年邑令旌獎

郡志

謝自強妻姚氏蒲圻人歸謝二載夫卒自經獲救語

其儕曰夫早逝無子必以我殉竟死

舊通志

劉觀妻周氏 妾張氏蒲圻人觀卒周年二十七與
妾張氏俱誓死以雙節稱撫兩孫偕入泮

劉元妻魏氏蒲圻人祭酒觀女孫年二十五夫卒守
志教三子有成年三十即營穴夫墓旁至九十六始
卒

曾曰忠妻魏氏蒲圻人年二十而寡子士雄僅二歲
織紉課讀卒至成立

譚廷玉妻王氏蒲圻人年二十五夫死守志不二教三子必軌於正年七十二卒

謝烈女蒲圻人名三淑侍御師啟女孫許聘庠生魏柱國獻賊屠城女年十四避地獺山為賊所獲奮躍方塘而死

以上舊通志

黃宸妻朱氏蒲圻人宸卒朱年甚少家且貧晝夜紡績養嫡鄭氏及遺孤勤苦無怨嫡亡獨守以終

郡志

廖秉文妻蔣氏崇陽人年二十一而寡遺娠生子子守

節不渝永樂中旌

舊通志

生員楊鑑妻吳氏崇陽人早寡或奪其志氏斫庭前桂誓曰此吾夫手植者欲改行有如此桂以壽終

張經世妻石氏崇陽人未笄夫死臨穴朝夕哭奠事留姑甚孝留姑歿氏毀傷竟不起

馮璽妻楊氏崇陽人夫亡氏年二十撫妾遺腹子完節

知州馮鼇妻某氏崇陽人妾谷氏順天人谷本納

之於賈肆熬亡谷年二十與某皆無子相誓死守紡績易食某死窮益甚而節益堅

汪庭妻程氏咸寧程沂女適崇陽汪庭庭早卒氏泣血喪明撫妾子成立有司表其門

饒安世妻金氏休寧人崇陽饒安世娶為側室年十九安世沒置靈榻牖哀聲數十年不絕形毀骨立以死

陳子達妻江氏通城人永樂中夫運糧死於途氏年

二十五誓不他適苦節六十一年

周貞妻劉氏興國人名茂惠父英謫任海鹽以氏適貞夫歿父亦歿氏還興國時年二十餘依弟以老

以上舊通志

劉壽暹妻陳氏明一統志興國人夫歿無子遺兩妻陳禮嫁之苦節四十餘年詔旌其門

張鳳妻劉氏興國人夫歿氏年二十嚙指誓守年八

十卒

舊通志

馮貞女興國人名慕潔許聘嚴某嚴卒馮往哭之成服踰年舅姑皆卒力殯三喪後貧無所歸依弟終身有司歲給米帛

石貞女興國人名瓊秀諸生石漢女許聘張經世經世病革瓊秀赴喪次一慟幾絕徐強起上堂拜舅姑曰不幸猶得事二尊人無他志矣辛苦饑寒癯然骨立後數年嘔血死

趙璉妻從氏興國人名二姑夫病且死目之不能言

氏泣曰得無以妾為念乎惟與君同穴耳夫既葬私語其婢曰幸善事吾姑因給婢出自縊死

知縣陶弼妻艾氏蜀什邡人興國陶弼令綿竹時納焉弼死無子妻黃妒悍不為哀氏獨撫棺哭七日夜不食死黃乃瘞其骨壞垣下且逕其上州守楊士元遷葬弼墓為文祭之

陳國相妻徐氏興國人舉人汝化女夫死年甫二十以死自誓躬織絰撫成二孤

吳稽妻張氏燕人吳寓燕中娶之稽客死不能歸父
母欲令改適氏焚夫骨裹之左臂抱二歲孤沿途趨
食奔回興國守志以歿

吳璧良妻盧氏興國人年十九夫亡無子守志奉舅
姑貧苦備嘗雙目俱瞽老死無悔

潘師孔妻江氏興國人年二十夫死子良臣方九月
氏矢節敬事舅姑及歿殯祭成禮勗子以學

劉宗牧妻李氏興國人十七孀居樞遺腹子良礪苦

節六十三年礪生世斗成進士

孫瑜妻皮氏興國人年十九夫亡撫子啟泰補州庠而夫遂乏嗣奉姑至老

李本素妻王氏興國人避獻賊入徐山聞警與夫同縊死子正蔚正英

江惟海妻盧氏興國人年十七生子孺生僅數月而夫死氏鍼績事舅姑孺生為流賊掠去越七年歸卒媳遺腹生一子而孀媳改醮氏孑然獨處垂五十年

劉學良妻莊氏興國人富池驛莊家僮莊寧女年十六嫁劉學良亦人僮子也越一年學良卒氏執喪甚哀久之有少年傭耕者求贖主及舅姑許之至期氏自縊死

徐廣妻舒氏大治人弘治間夫客吳溺死父母憐其少而貧欲奪其志誓死不改撫二子有成卒年六十二

胡肫妻程氏大治人名香兒適胡甫八日以歸寧偕

夫渡三山湖值風濤夫墮水即赴水從之舟人援起
氏號痛曰夫亡我奈何獨存衆挽其袖竟絕袖而溺
皮克昌妻黃氏大冶人年十八夫亡撫七月遺孤庶
姑不能奪其志泣血過劇目為之枯

王祉妻楊氏大冶人夫亡氏年二十八苦節孀居事
姑以孝聞教三子有聲庠序萬厯中旌

黃筮妻詹氏大冶人年二十一夫亡撫子以鼎入泮
清操六十五載萬厯中旌

盧時化妻陸氏大治人年二十餘夫亡孀居撫子卒
至成立

李春開妻盛氏大治人夫歿氏年二十誓節撫子閭
里稱之 以上舊通志

周雪盤妻楊氏大治人年二十四守節撫五歲孤天
啟甲子舉人周寧爾也氏壽八十 郡志

阮興妻全氏通山人年十九夫亡遺腹生一子繼姑

欲奪其志矢死完節 舊通志

朱之彥妻劉氏通山人年十八夫喪清潔自守數十
年無懽笑聲後旌

沈思文妻陳氏通山人夫喪氏年二十二舅姑俱歿
遺兩孤誓死自守苦節六十三年

熊民懷妻焦氏通山人年十八適熊方八月夫卒養
姑孝謹矢節終身

以上舊通志

皇清生員劉滋妻徐氏江夏人年十七歸劉生子遇文
才三齡而滋赴陝撫幕殂於逆旅氏聞訃捨號一

日三雉經翁姑解救慰勉乃已無何父母欲奪其志私許名門挈舟以迎氏覺奮身投水中援之不死遂截髮毀容茹苦事舅姑撫藐孤及三孫純臣良臣名臣皆相繼入庠會闖賊南竄殘武昌氏年且七十罵賊而死順治十六年 旌

長山烈婦未知籍貫或云婦姓范又云姓鄔順治乙酉闖賊南竄驅襄郢士民以從婦與夫俱被掠至壽昌途中得脫夫病歿於長山舖婦身餘一珥

即以珥泣倩人掘穴有少年陰喜婦色爭為穿穴
穴成強婦偕去婦曰深之俟我下視下則以手枕
夫屍痛哭觸顙流血批土自掩曰乞並埋我衆挽
之不起會天暮風雨暴作衆皆委去平明往視見
血流滿面死矣里人拜奠為成塚號長山烈婦塚

黃岡胡珙為之傳

舊通志

皮貞女通城人名鳳貞十三許字周文彬周陷於
流賊鳳貞獨處以待至數十年無異

余士鳳妻黃氏江夏人年二十六夫隕撫遺孤楚珩入庠復早世家徒四壁矢節彌堅年八十有二卒

經歷凌昇妻束氏江夏人未字刲股救母及歸凌生二子俱幼夫死茹素撫孤年六十有二卒

生員陳天柱妻萬氏江夏人夫歿氏年二十子嘉檄尚襁褓忍死撫孤事舅姑至孝後嘉檄以軍功知雲南鄂嘉縣夫婦繼殞復撫孫成立年八十二卒

陳毫妻桂氏江夏人年二十餘夫歿奉孀姑生死盡禮撫孤昌謨舉於鄉

劉國柱妻楊氏江夏人年二十二夫亡兩子又繼歿遺二孫兩婦與姑同志守節氏年至八十有二卒指揮李懋德妻朱氏江夏人宗室女年二十餘寡居流賊薄省城氏守姑柩不忍去紹兩子出走反闔其扉賊至刃於柩側

生員郭惟一妻孫氏江夏人惟一以哭父死氏年

二十八伯氏圖其貲欲以己子繼嗣氏曰未亡人有遺腹生子固幸如女立嗣未晚也伯氏乃遣其僕為媼粧以嘗氏卒不敢犯又賄尊媪俟其媼殺氏謀頗露氏峻防之將媼獨閉寢戶暈絕數次始生男會同里有窶人毛姓同日生女伯氏因捏以女易子訟於官刺血非偽伯氏伏罪孤兒名炳氏苦節教之為名諸生

余應試妻舒氏蒲圻人年二十餘而寡勤家教子

苦節五十餘年

雷元聲妻陳氏蒲圻人夫卒氏年二十四遺子女各一髧髮以誓子繼喪紡織自給以老

生員尹如翁妻余氏大冶人夫死氏年二十二僅遺一女家徒壁立死不易操

柯楚吾妻王氏大冶人年二十三夫歿遺週歲女氏知家族覬覦所有盡散之止留一老婢為伴辟
纊苦節五十餘年

陳大明妻華氏大冶人年十九夫卒遺孤甫三月
守志撫孤年六十七卒

查某妻段氏 生員查詔妻張氏大冶人段年十
九而寡撫孤詔為諸生又喪媳張氏年少無所出
相依守死

廩生胡秉炅妻柯氏大冶人夫亡氏年十九遺孤
方二歲苦節撫育卒年五十餘子齊泌中康熙乙

酉鄉試

中書余光煌妻詹氏大冶人歸余五載無出余病卒氏誓死殉父大衢解之曰爾獨不為姑計乎乃忍死事姑雕夫像置室中飲食必祝縞素數年姑亦卒氏悲慟致疾不食不飲藥尋卒年三十七

陳烈女大冶人年及笄而夫大有興國州民欲娶之已成言矣而女不知迎者至門遂縊死

以上舊

通志

劉蘭妻胡氏江夏人年二十夫染危病慮無後立

姪定遠承祧明年夫卒氏欲以身殉翁泣阻乃止
後翁歿氏率子禮葬教子及孫皆成名卒年六十
一康熙三十六年 旌

生員吳啟豫妻劉氏大治人年二十七夫亡遺兩
孤俱幼歲凶日噉半菽室被火結茅不足蔽風雨
撫育兩孤奇慘萬狀康熙三十六年 旌

朱萬鐸妻王氏通山人年十九夫亡遺腹生一子
舅姑早逝無伯叔兄弟祖姑年邁氏自減饔飧以

奉之躬勤紡績課子成名康熙三十六年 旌

朱萬祚妻劉氏通山人年十八夫亡遺腹生子
盡力女紅養孀姑撫孤子歷三十七年康熙三十

六年 旌

教諭劉復元妻傅氏江夏人年二十六夫亡苦節
四十七年白首如一撫孤重鼎為郡庠生康熙三
十七年 旌

生員周寧妻謝氏大冶人年二十夫亡恒忍飢奉

舅姑甘旨舅姑歿經營喪葬撫孤及幼叔俱至成
立康熙四十四年 旌

蔡爾綿妻胡氏江夏人年二十二夫亡子幼祖姑
與舅姑俱待養氏拮据奉甘旨及歿經營殯葬極
為竭力教子于雯列明經康熙四十六年 旌

羅國棟妻梅氏江夏人夫貧不自支欲氏與人亂
以得金氏不從遭遇市民余祥雲迫脇投繯死康
熙四十九年 旌

生員張岱妻殷氏江夏人年二十六夫亡姑相繼
歿零丁孤苦教子成名康熙五十年 旌

葉芬妻胡氏武昌縣人年二十夫亡遺孤五歲勤
紡績躬儉約以事姑姑歿事繼姑尤謹苦節四十
五年康熙五十二年 旌

柯大衍妻陳氏大冶人年二十三夫亡遺孤僅九
月翁姑俱老氏竭力奉養苦節四十餘年教子登
賢書康熙五十二年 旌

容祐祖妻畢氏江夏人年十六適容夫抱疾氏侍
湯藥四載罔倦夫亡遺孤忒僅五月教育成立為
邑諸生夫之兄弟繼亡撫姪與女無異已出康熙
五十三年旌

監生蔣宏道妻朱氏江夏人年十七適蔣遺孤復
天氏哭夫悼子血淚維枯鄰家火將及其舍氏守
夫靈弗避卒得免苦節二十一年康熙五十三年

旌

生員陳光祚妻汪氏江夏人年十五歸陳期年夫
亡閉戶自經姑覺而救之遺腹生女以祚弟光祉
之子繼其後氏教育恩勤不啻已出光祉復無後
又以孫主其祀康熙五十三年 旌

葉溥天妻戴氏江夏人年二十三夫亡無子事孀
姑曲盡孝養姑歿號泣不欲生人勸之乃強起經
營殯葬節孝兼至康熙五十三年 旌

葉蓄天妻戴氏江夏人年二十八夫亡遺子方葱

僅二歲孝事孀姑壽九十卒氏哭之極哀猶以奉
養有缺為憾教子力學由明經仕至通判康熙五
十三年 旌

柯士珩妻吳氏武昌縣人年二十夫亡子方三歲
舅姑待養躬織經奉甘旨舅姑相繼歿喪葬盡禮
課子極嚴卒至成立康熙五十三年 旌

陳正衍妻胡氏江夏人年二十八夫亡氏撫孤守
節三十年如一日康熙五十六年 旌

熊文煥妻魏氏江夏人年二十五夫卒遺孤龍章
僅一歲苦節三十年康熙五十六年 旌

高孚占妻楊氏江夏人夫歿氏年二十七奉事舅
姑極盡孝養遺孤珩珍俱乳穉備經艱苦教育有
成苦節四十一年康熙五十六年 旌

郭竒遴妻王氏江夏人年二十夫亡立嗣繼夫後
事翁得其歡心每哭奠其夫必伺親睡熟舌吞聲
飲泣苦節三十五年康熙五十六年 旌

龔良柱妻余氏咸寧人年二十七夫亡事舅姑極孝教子文玉為名諸生康熙五十六年旌

趙烈女江夏人名舉姑貢生趙廷璧季女年二十許字盧兆璜盧因家難慘死女聞訃即自縊父覺救免尋父病女含淚侍湯藥七閱月覘父病漸瘳乃衣縞素自縊庭樹死康熙五十七年旌

楊祖位妻崔氏江夏人年二十二歸楊明末獻賊之亂以身衛姑同溺水七日不死後夫歿氏年二

十八教子璿有文名娣妣亡撫姪成立媳亡撫孫
從洵登賢書康熙五十八年值氏百齡具題 旌

表

郭竒遵妻程氏江夏人年二十四夫亡即欲身殉
姑勉慰乃止自忍飢寒奉姑甘旨無缺雍正元年

旌

貢生婁正詔妻高氏江夏人年二十八夫亡矢志
苦守翁遠出每遣子送土產以奉之無何翁客死

氏脫簪珥衣服奔喪歸葬苦節三十二年雍正元
年旌

監生吳錕生妻黃氏黃岡諸生嘉烈之女錕生江
夏人早卒氏年二十六子溥僅一歲奉姑盡孝苦
節四十年撫溥成立食餼郡邑而孫皆入泮雍正
元年旌

孫自起妻楊氏江夏人年二十二夫亡遺腹生子
教育有成苦節四十四年雍正元年旌

朱世澤妻楊氏江夏人夫替於楊歿氏年十七即歸事舅姑克盡孝養苦節經三十一年雍正元年

旌

毛烈女江夏人名如姑年十八許聘徐三級徐亡女聞訃即欲以身殉家人環泣輪守女故作歡笑狀衆乃懈竊入磨房投繯矣雍正元年旌

陳貞女江夏人年十九許字鄭澤達未婚鄭亡女聞戶自縊父母泣救得不死因請歸鄭立嗣以主

夫祀教之成立霜天月夕嘗有孤鶴繞其舍而鳴
人以為貞節所感雍正元年 旌

江漢臣妻李氏大冶人年十九夫亡子幼苦節三
十七載雍正元年 旌

李右孟妻王氏興國州人年二十九夫亡苦節五
十載撫子之晁事氏曲盡孝養人咸稱李孝子孫
應熙登鄉薦雍正二年 旌

胡上進妻詹氏江夏人年二十七夫亡遺孤僅半

歲抱子親營塚壙奉姑極孝姑病衣不解帶者累
月與鄰婦語必以孝順為本比閭皆為感化雍正
三年旌

蕭容裕妻陳氏江夏人年二十六夫亡子幼姑早
逝遺幼叔撫之過於已子事繼姑曲盡慇懃苦節
二十九年雍正三年旌

揚子仁妻鮑氏江夏人年二十九夫亡遺孤冰鑑
甫三月家極貧晝夜紡績事舅與繼姑盡孝舅病

氏親嘗湯藥祈神願以身代病遂瘳姑之族黨有
困乏者氏典衣推食百計周恤以慰姑心翁姑歿殯
葬盡禮教子成立苦節二十五年雍正三年旌
兵丁邵嗣永母汪氏江夏人二十三歲夫亡苦節
三十年雍正三年旌

呂順吾妻姜氏武昌縣人年十八夫亡遺孤僅三
月宗族逼其改適氏抱孤沈水濱以死誓議始寢
時舅已老氏竭力奉甘旨課子不少姑息屢遭闖

獻之亂獨先機避之舉家獲全年七十六卒子大夔郡庠生曾孫璜乙酉舉人雍正三年旌

劉愈六妻黃氏嘉魚人年二十三夫亡親執畚鍤營壙居墓旁朝夕臨哭舅姑老病親侍湯藥嘗而後進及歿殯葬如禮遺孤復大與媳朱氏相依守節教三孫成名卒年九十六雍正三年旌

彭昌禧妻左氏江夏人年二十三夫亡遺腹生子與老姑同起卧姑歿竭力殯葬課子若孫苦節六

十載雍正四年 旌

生員朱湛鎔妻曾氏 生員朱英妻秦氏江夏人

曾年二十七夫亡守節雖密邇母家非婚喪不輕
往來外人罕睹其面撫孤英弱冠入庠娶秦氏未
幾英復夭秦年二十八恐姑哭子過哀忍泣承歡
奉養數十年一門雙節雍正四年 旌

李學詩妻胡氏江夏人夫亡氏年僅十六事姑以
孝聞遭亂數日不得食瀕死復生雍正四年 旌

喬作棠妻蕭氏江夏人夫歿氏年二十六親老子
幼獨力奉養撫孤成立雍正四年旌

兵丁郁錦繡母任氏江夏人夫亡氏甫十九門祚衰
薄依兄嫂守志三十一年備嘗辛苦雍正四年旌

易子創妻陳氏江夏人十九夫亡遺孤僅一月矢
志苦節子稍長擇師授以五經有文名氏年四十
三卒雍正四年旌

盧聯瑞妻朱氏蒲圻人年二十二夫亡子幼遺流

賊亂負孀姑避難流離辛苦得免於死教子逢益
成明經卒年八十三雍正四年 旌

生員廖師臣妻何氏 妾張氏 生員廖駿生妻

潘氏蒲圻人何年二十八夫亡無所出妾張氏生
子駿生將二齡氏同矢節數十年事孀姑曲盡孝
養駿生入庠復歿媳潘氏年二十五亦矢志不嫁
一門三節雍正四年 旌

程仲呂妻陳氏蒲圻人年二十四夫亡家貧苦節

每斷炊晏如也一日子從外塾拾遺金歸氏亟命
待其人還之值流寇亂人咸逃竄氏獨不去或促
之行氏曰此正我死日也未亡人安往乎已得免
子衍洛邑庠生雍正四年 旌

魏良勲妻揭氏崇陽人年二十一夫亡遺孤甫週
歲翁姑俱老竭力奉養課子成名雍正四年 旌
生員王國祚妻梁氏江夏人夫亡氏年二十七子
幼撫教成立舉二孫亦賴義方之訓雍正六年 旌

蕭天相妻胡氏江夏人夫亡氏年二十八子甫三
齡撫養成立奉孀姑以孝著守節三十一年雍正
六年旌

余司楚妻吳氏蒲圻人年二十六夫亡孝養舅姑
撫諸子成立鄰人弗戒於火氏獨護木主一切不
顧苦節四十五年雍正六年旌

葉維漢妻張氏江夏人年十九夫歿誓死不二值
歲荒百計易米以膳舅姑患腹疾閱半載床第扶持

旌

晨夕無間教子如壁就傳不少姑息雍正七年

婁珣妻孫氏江夏人歲貢如玫女適儒士婁珣請
書攻苦成疾氏侍湯藥衣不解帶者經年夫卒氏
年僅二十四養翁姑撫幼子不下堂階鄉鄰莫窺
其面淒風苦雨惟聞紡績聲年至六十一雍正七
年旌

張又齡妻李氏江夏人年二十三夫亡止一女遺

命撫養贅婿有胞弟若齡並囑日後生子可撫以繼嗣氏泣諾因擇蕭氏子宏烜為婿延師教之詎若齡年逾五十尚未舉子氏乃望斷腸迴苦節二十九年雍正八年旌

王路妻閻氏咸寧人年二十三歲夫歿遺孤數齡翁年且邁氏奉侍惟謹病篤囑氏曰我死須葬祖墓側及卒氏遵遺命往厝族衆阻之氏撫棺山中日夜號泣勺水不入口衆哀感併力開穴氏負土

封之性嚴肅義方訓子雍正八年旌

梁方迪妻劉氏興國州人年二十六夫歿遺子
先佐甫六月孀姑衰老氏獨力操持曲盡孝養
教子有成五孫林立卒年四十有三雍正八年

旌

周之琬妻洪氏江夏人年二十七夫歿遺腹生子
廷燦茹苦撫育孝事祖公姑及孀姑養葬盡禮訓
子不少姑息比長為授室未幾廷燦復歿氏與媳

同心守節為媳立嗣或勸其自嗣氏曰吾嗣子恐
寡媳無依嗣孫則兒祀有賴也卒年五十三雍正

九年旌

補遺

皇清監生曾士開妻湯氏江夏人十八于歸二十夫亡

遺一子明試甫歲餘氏撫之成立後補弟子員家

貧勤紡績以奉舅姑孝養備至守節三十九年卒

年五十九康熙三十三年旌

湖廣通志卷六十六